

Nos Hendenan Special

Pa: Mercedes Abdul

Joy Kock:

"ARUBA TA HOPI RICO DEN TALENTO MUSICAL Y NOS MESTER COMPARTI ESEY CU MUNDO"

Nos invitado awe den nos espacio "Nos Hendenan Special" ta señor Jesus (Joy) Kock, un persona hopi activo den nos comunidad, kende actualmente ta consehero di Ministerio di Asuntonan Cultural.

Un mision hopi special cu e tin ta su buki "Biografia di nos Musiconan" cu otro aña lo ser publica. Durante ocho aña e tabata hefe di delegacion di Festival OTI y mirando cu tin tanto talento musical na Aruba, su intencion ta pa revivi e participacion di Aruba den dicho festival.

Sr.Kock ta casa cu Blanca Alcida Fingal, cu ta maestra di school, y nan tin dos yiu homber yama Kevin y Andy Michael.

ESTUDIO

Joy Kock a pasa su enseñanza basico y secundario na Dominicus College. El a bay La Salle College, a haci estudio di Algemene Ontwikkeling, tin diploma di MAVO-4, diploma di Dale Carnegie "Effective Speaking" y Relacionnan Publico y Redactor di Discurso (Speech Writer), tambe di Middle- Management, Time-Management, diploma di computacion.

Ademas el a studia abogacia durante dos aña, y tambe el a haya su diploma di E.H.B.O. A sigui un curso di 4 aña di musica door di Frere di La Salle, y durante un aña a sigui curso di areglo musical.

Fuera di esey e tin diploma di "Scuba Diving" y a sigui un curso di "Derecho de Autor" na Mexico.

TRABAO

Riba su experiencia di trabao, Sr. Kock ta relata lo siguiente: "Tempo cu mi a cuminsa traha tabata na British American Life Insurance como agente di benta. Eynan mi a traha dos aña, y despues mi a bay traha pa gobierno den Departamento di Administracion di Huis van Bewaring. Despues di 13 aña mi a ser traslada pa Instituto di Cultura di Aruba.

Na Instituto di Cultura mi tarea primordial tabata pa haci investigacionnan riba historia di Aruba, nos musica tipico, y traha pa pasa via Tele-Aruba documentonan cultural.

Pa un temporada mi tabata hefe interino di e Instituto.

Na aña 1995 mi a baha cu pension y actualmente mi ta consehero di Ministro Lili Beke riba asuntonan cultural".

COMO CONSEHERO

"Na Ministerio di Asuntonan Cultural, mi tarea ta di duna conseho ora cu Ministro ta haci peticion. Por ehemplo, riba proyectonan tocante expresion artistico manera canto, baile, teatro, musica en general, pintura, escritornan, y agrupacionnan cu mester haci bishita den exterior.

E consehonan ta bay a base di mi 40 añanan di experiencia riba tereno musical, artistico y organizatorio. Esaki ta un trabao hopi interesante mirando cu e ministro ta dunando su maximo cooperacion na aporte di nos cultura".

COMO ESCRITOR

"Desde aña 1993 mi a cuminsa skirbi e buki yama "Biografia di Nos Musiconan". Mi a cuminsa Motito Croes, cu mi ta considera un protector hopi grandi di nos folklore. E idea tabata pa skirbi solamente di personahenan riba tereno di musica local. Pero despues a bini e idea pa hacie di tur musico di Aruba, desde Motito te hasta esnan mas actual.

E buki actualmente ta pa tres cuarta parti cla pa loke ta trata e manuscrito. E buki ta bay contene hopi potret individual y di agrupacion.

Durante Juni 1995 mi a entrevista na Hulanda alrededor di 50 musico Arubano. Esaki a sosode durante un siman caminda mi a haya e maximo cooperacion di Ministro Mito Croes. E trabaoan aki a tuma lugar na Cas di Aruba na Den

Haag.

Nos tin e buki proyecta pa ta riba plaza na Juni 1997. E trabaoan di imprenta lo bay worde haci na Aruba mes.

Mi a haya cooperacion di linguistanan manera señores Mario Dijkhoff, Pedro Velasquez, y tin conversacion andando cu Sr. Jossy Mansur pa haci coreccion den e manuscrito completo.

E buki ta worde skirbi completamente na Papiamentu. Como cu gobierno a decreta 1997 como "Aña di Papiamentu" e edicion di e buki ta cay hopi bon.

E meta ta pa nos tin historia skirbi pa keda como testimonio pa generacionnan di futuro, y naturalmente pa nos comunidad actual. Biblioteca Nacional, corantnan, schoolnan lo haya un ehemplar di e buki aki".

E financiamiento pa e imprimi e buki ta cay bao di Ministerio di Cultura.

"Tambe den pasado mi a yega di skirbi articulonan cultural pa DIARIO, y ademas mi a skirbi e buki recordatorio di 60 aniversario di Club Deportivo Aruba Juniors".

FESTIVAL OTI

"Aruba a participa un total di ocho vez den e Festival Internacional di OTI. Den e ocho ocasionnan aki mi tabata semper lider di e delegacion y Claudius Philips na aña 1983 a sali segundo finalista na Washington D.C. Esaki tabata e logro mas grandi cu nos pais a alcanza.

Despues cu mi a retira Aruba no a participa mas den e Festival di OTI, ya pa cuatro aña consecutivo, loke ta hopi lamenta. Ta mi intencion a traves di e gerencia di Tele Aruba y di Ministerio di Asuntonan Cultural revivi e participacion di Aruba na e Festival OTI. Esaki posiblemente pa aña 1997. Aruba ta inmensamente rico den talento musical, y nos mester comparti esey cu mundo".



UN MOMENTO MEMORABLE

Un momento memorable y honorable pa Joy Kock tabata ora cu el a dirigi e Orquesta Nacional, inaugurando nos Himno y Bandera, na aña 1976. "Tabata dentro di 24 ora cu Sr. Betico Croes, di feliz memoria, a yamami na mi residencia pidimi asistencia pa cu e inauguracion di nos Himno y Bandera debi cu e coro a comunique cu nan no por cumpli cu nan peticion.

Na e momento ey mi a yama sra. Maybelline Arends-Croes y conhuntamente cu nos Orquesta Filarmonico di Aruba nos a ensaya e mesun merdia y anochi nos a cumpli cu e peticion di Betico. E tabata un momento hopi honroso".

COMO EMPRESARIO

Actualmente Joy Kock ta Gerente General di su propio agencia di viahe.

"E competencia ta grandi y mi ta kere cu e mercado actualmente ta satura. Pero nos tin un clientela sumamente satisfactorio. E idea ta pa mi yunnan sigui maneha e empresa aki".

OTRO ACTIVIDAD-

NAN

Sr.Joy Kock tabata Vicepresidente di e Comision Himno y Bandera; vicepresidente di e plan vacacional Aruba-Venezuela; Presidente di e siguiente organizacionnan: Fundacion Promocion Cultura Arubano; Adayma; ASOMA; Fundacion Academia Musical di Aruba; OTI. Tambe fundador di Orquesta Filarmonica di Aruba. Miembro di Jazz & Latin Music Festival; co-fundador Watapana Festival cu awe ta Bon Bini Festival. Miembro di e comision di censura di pelculanan, y miembro di Consejo di UNOCA. Tambe e tabata un di e prome miembronan di Aruba Junior Chamber.

E tabata lider di delegacionnan pa festivalnan internaeional na Puerto Rico, Washington, Miami, Argentina, Peru, Chile, Mexico, Venezuela, Colombia, etc.

Tambe e tabata cooperador pa e prome celebracion di "Arubadag" na Hulanda, y ARSCA "Telethon" a ser dirigi pa hopi aña door di dje, yudando riba tereno social-cultural. "ARSCA tabata un organizacion cu tabata yuda riba tereno social, y tur aña tabata tene un telethon grandi pa yuda esnan menos afortunada. Durante hopi aña mi a dirigi e telethon, y ta lamentable cu e actividad aki no a ser organiza mas ya cu a traves di dje hopi hende a worde yuda", finalmente Joy Kock a comenta.